

Harbour Board. Tera e pohehe te tangata ina kite i nga waapu i Poneke, i Akarana ranei, na te Kawanatanga nui era hanga. Kaore, na aua Poari. Na te Paremata i tuku atu kia ratau te mana ki te hanga waapu, ki te whakahohonu i te moana, ki te tanu haere i te taha moana, ki te whakaara whare nunui, hei putunga mo nga taonga o te tuawhenua, mo nga taonga haere mai ranei o tawahi. Ko nga moni i taea ai enei mahi nunui, e tae ana ki nga miriona maha, he mea nama na te Poari. Ko te punga o ena moni ko nga rawa a te Poari, ko nga reiti hoki e kohia ana e ia i te tau. Ki te whakaaro ia, he pai ke ano mehemea i puritia e te Kawanatanga nui mana e mahi enei mahi nunui. Otira kua kitea e te pakeha i ona whenua i heke mai ai ia, he pai ke te ata wehe i tetahi ropu motuhake i waho atu i te Kawanatanga hei whakahaere i tenei wahanga o ana mahi nunui.

Ko nga Kaute Kaunihera e whakahaere nei i nga rori kei te mohio tatau, he mea enei e tutata mai ana kia tatau ki te iwi Maori. He mana nunui ano o ena ropu, e rite ana ki nga mana o nga Kaunihera o nga taone.

Ko te kaupapa ia o enei ropu katoa he kotahi tonu, ara ko te iwi nui ano hei pooti i nga mema mo aua ropu, ka kiia ai ko te Iwi Nui ano kei te whakahaere i a ratau tikanga, ma roto i o ratau mangai i whakatu ai ki roto ki aua ropu. Kei tena kaupapa etahi o nga tautohe i roto i te Paremata. Ko te kaupapa pooti hoki mo nga Kaunihera o nga taone e penei ana ano i te pooti mo nga Mema Paremata, ara, ka pooti nga tangata katoa i eke nga tau ki te 21, ahakoa he tangata whai rawa, he tangata rawa kore ranei. Ko te take i peratia ai, ko te nuinga o nga mahi a nga Kaunihera o nga taone e pa ana ki nga tangata katoa e noho ana i aua taone, ko te mahi i nga tiriti, ko te whakahaere i nga mea hei hari atu i nga paru, ko te whakatakoto wai pai hei kai ma nga tangata katoa, ko te whakahaere i nga raiti, i nga taramu, i nga hohipera, i era atu mea e pa ana ki nga tangata katoa.

Na, kei nga rohe Kaute Kaunihera nei ko nga tangata utu reiti anake, e whaimana ana ki te pooti i nga mema o te Kaunihera, a ko te maha o nga pooti o te tangata kotahi e whakaritea ana i runga i te nui o nga reiti e utua ana e ia. He maha nga mema o te Paremata kei te tohe kia whakawhanuitia te mana pooti mo nga Kaute Kaunihera, kia whaimana nga tangata katoa e noho ana i roto i taua rohe kua eke nei nga tau ki te 21. He tika ko nga whenua anake kei te reititia, te homai i te kaha moni ki te Kaunihera. Otira ko nga rori e hangaia ana, ko nga piriti, e manaakitia ana e nga tangata katoa. Na te tokomaha o te tangata ki te rohe noho ai ka whai wariu tenei hanga te whenua, ka manaakitia nga ahua o nga paamu. Ko nga tautohe ena a tetahi wahanga o te Paremata. A, ki te whakaaro ake taihoa ano ka tutuki ki ta ratau, ka waiho ko te tangata hei mea nui, ko nga rawa hei mea iti.

Kaore e hapa te ora o te rewharewha me te maremare i te
WOODS' GREAT PEPPERMINT CURE— 1/9, 2/9 patara.